



BANTU MUSLIM 'BIJAK RANCANG WANG' IKUT SYARIAH

AMP lancar projek bersama firma swasta

SEBUAH program bagi membantu individu Melayu/Islam yang mantap kewangannya mengurus dan menambah kewangan mereka dilancar Angkatan Karyawan Islam (AMP) kelmarin.

Dinamakan Projek Bijak Merancang Wang, program tersebut dikendalikan AMP dengan kerjasama HTHT Advisory Services Pte Ltd.

Ia bertujuan mendidik masyarakat Melayu/Islam supaya bersikap bertanggungjawab dan berjimat cermat sambil mengurus harta mereka dengan bijak agar ia boleh bertambah.

Antara lain, program itu memberi tumpuan pada pengurusan dan perancangan kewangan peribadi, zakat dan perancangan estet berdasarkan hukum syariah.

Turut dianjurkan ialah siri bengkel umum mengenai pengurusan harta di peringkat akar umbi bermula Mac tahun depan serta satu seminar tentang pengalihan harta dalam pengurusan estet bagi firma guaman dan agensi pemerintah.

Melancarkan projek itu, Anggota Parlimen GRC Pasir Ris-Punggol, Dr Ahmad Mohamed Magad, berkata itu selaras dengan rancangan pemerintah membantu warga Singapura mengurus kewangan mereka dengan lebih baik melalui program pendidikan kewangan kebangsaan MoneySENSE.

Dr Ahmad berkata beliau melihat program kendalian AMP itu sebagai melengkapi MoneySENSE. Selain itu, program khusus yang memberi kemahiran kewangan berlandaskan syariah Islam dapat mengisi kekosongan kini.

'Kelas agama kendalian kebanyakan asatizah atau guru agama lebih tertumpu pada ilmu rohaniah. Hanya segelintir yang menyentuh tentang isu dan kewajipan sosio-ekonomi.

'Dalam era perubahan dan ketidakpastian ekonomi, pengurusan harta peribadi dalam konteks konvensional dan Islam perlu dilihat sebagai tanggungjawab asas setiap Muslim,' kata beliau.

Turut dilancar di majlis itu adalah tiga buku kewangan yang dihasilkan HTHT.